



977140

延秋吟館詩鈔

李文田題



光緒乙酉
仲春重刊

序

詩主性靈而造詣乃根於閱歷綜觀古人之詩必心有
所得始能卓然名家也若夫聲響皮附剽竊依傍自謂
足附風雅者未足與言詩也予好吟弄近卅年中又好
出游歷衡湘沿長江之吳越度重洋覽之采登碣石以
歸故鄉又出幽燕齊魯之邦踰大河而南行然習聞陽
朔山水之奇甲於宇內獨未得泛灑水並大藤峽以覽
峯險爲平生勝觀而吾友丹叔乃獨能探其勝槩丹叔
工詩服官粵西權靈賀全州守慶遠所至政聲蔚起往
來於煙嵐蒼鬱之域踰五六年故其篇什之美爲益進
當庚申辛酉之間丹叔以禮官奉命回籍團練嘗與
冰叔琴川鐵崖希祖暨子探韻索句共爭奇麗每多側
豔之作迨適京師忼慨世故畱連舊游復多感激之作
自官粵西如自惕示子登邑樓桂水行陽生曲諸篇或
出至性或憫時艱或敦厚以立言或詭倣以寓諷以視
夫前之變側豔爲感激之作則所變愈極而所詣乃愈
上矣丹叔奉諱還里後取舊所作自加刪定釐爲二卷
因以示予予方促促家居耳目蔽塞學亦不進固不必

延秋吟館詩鈔

卷一 序

一

於丹叔之政聲爲可企卽丹叔之詩其末技耳而予視
之乃猶瞠乎自失也曷足以序丹叔之詩哉然予與丹
叔交最久知最深故撮其梗概爲弁諸簡首云光緒二
年秋七月蓋平姚正鏞

延秋吟館詩鈔
序



序

昔唐元結工文詞著述人至今稱之其爲道州刺史也
遭西原賊之亂賊退有示官吏詩未作詩以前不知其
能詩人既知其能詩而漫叟又不僅以詩傳也及考其
交游如顏清臣杜少陵或以氣節傳或以工詩著乃知
結之交友獲益始可以至於斯也然則元結爲人不高
出尋常百十倍哉而以丹叔視之何其宛然相肖也丹
叔之學詩也由於陳研香而至秦州也則交李冰署姚
仲海研香詩人冰署仲海亦工詩者以視夫元結之交

延秋吟館詩鈔

序

三

顏清臣杜少陵豈有異耶而宦遊粵西與元結之道州
相接壤其治盜賊懲凶頑弭禍於未然較之西原之賊
又何殊焉宜乎詩之日進而益上卓然爲衆所稱也乃
丹叔自爲謙遜以仲海及余爲知詩屬刪定之余卽所
知以告之其不知者亦不能妄言也仲海意見與余相
同所論較刻深余私謂人之詩必就人之體段言之腴
者觀其腴厚者觀其厚丹叔之詩雖未能畢至於厚然
以爲腴未嘗非腴之境也道州漫叟丹叔詩境亦未嘗
不與之同也雖然漫叟之爲道州也不聞別治他郡今

丹叔之於粵西也所歷之地已三四州縣終陞守慶遠
以丁艱始歸然則丹叔之事功超出於漫叟上者且未
可量矣吾之爲丹叔序詩竊願丹叔之功名德澤不僅
以詩傳而詩之可垂久以示後人則固友朋所共信也
丹徒莊忠楫

延秋吟館詩鈔

序

四

序

吾弟丹叔資稟聰穎方其少時卽以詩見賞於徐溝喬公數年後予與喬公遇而喬公猶嘖嘖稱道其詩之不作俗滑語得風人之遺意然予所望於丹叔者豈僅以詩著哉比年客京師遊大梁忽忽又七載聞君分守粵西所至有政聲去年冬余歸自京適君以奉諱旋里門手出治譜示予一再讀之躍然興慨然歎曰昔以詩朝夕相切劘者如琴川冰叔仲海希祖及君每有所作竊上下辨論以爲某作於家國德刑倫紀興衰得失皆明乎古今所宜而有憂深慮遠之思某作於物象名理變化情僞鑱刻苞並使人震發感動得之所以潔己正人之道若夫剽竊其體諧比其聲才佻氣僑言麗色侮棄以此相禁戒當是時江南糜爛淮徐多警惟海陵一隅精臺巖政寄焉時君方以禮官襄辦江北團練雖烽火四驚而吾儕壺觴風雅不絕何其幸也今琴川旣歿冰叔宦於浙而予與仲海希祖皆碌碌半生無所短長於世獨丹叔以一官宦遊萬里懃懃於吏治民生力求實效不數年受天子特達知擢慶遠太守其於家國德

延秋吟館詩鈔

序

五

刑倫紀興衰得失一一見諸施行而不負所學及所爲
詩又皆沈博純厚足以震發人之志氣無佻儻靡晦之
病其所詣相去爲何如哉益信徐溝遠於詩學故能知
丹叔之詩而予與徐溝相依七載辨難討論稍得作詩
之旨以序丹叔之詩夫何辭哉夫何辭哉光緒丙子七
月同邑張雲鵬拜序

延秋吟館詩鈔

序



自序

余幼不能爲詩及遊京師從伯父子陶公遊制義而外
間於公移文檄習之亦未嘗爲詩也歲庚申從儀徵晏
欽使至家鄉團練同行者爲泰州陳君研薊陳君固深
於詩者也因勸余作詩余亦稍稍爲之及至泰州又得
交姚君仲海於遲雲山館偕共晨夕又得甘泉李君冰
署丹徒莊君希祖時相切磨自是向之不專意於詩者
今益專力爲之矣歸遊京兆出宦灘江日積月累漸成
卷帙仲海見余詩勸付手民余之詩原不敢以問世第
念生平遊跡所經或可足以記之也於是畧述弁言
於卷首云時光緒丙子秋七月延秋吟館主人識

延秋吟館詩鈔

序

七

葛天浩唱意肇載民闕里詠歌旨歸達政是知詩者志也雖無爲而自發實不介而能孚翊世元勳恆寄興於篇什扶輪大雅多展效於循良能自立於詩之中必有餘於詩之外吾友丹叔弱挺秀容少耽柔翰高軒能賦大器蚤成憶已未歲余甫瑣闥簪毫丹叔正容臺習禮因連牆而通刺乍見面而傾心挹令君衣香三日不散與袁宏議論申旦亡疲而丹叔夢好餐花心虛師竹定文必求沈約問字甘作侯芭舊稿重鈔錄其十九片辭未愜商之再三聯詠禿千兔之毫排日爲隻雞之局盍

延秋吟館詩鈔

序

八

簪之樂如此云至維時寇氛甚惡廣陵戒嚴副憲晏公督練江北余與丹叔並佐軍諮顧景中原憤氣雲踊總轡遐路壯志颺馳望月動少陵之懷聞雞起越石而舞壁塵斜拂烟墨橫飛換羽移宮寄幽思於弦外撫時感事傾熱血於尊前君慕宗愨之乘風我卜終軍之遠到蓋觀其爲詩緣情體物悱惻動人綴慮謀篇昭晰入理有博大昌明之概無狄成滌濫之音香山冲夷居官則部民樂易樊川雄健治郡則豪右屏威彥和言觀文見心樂記云審樂知政良不誣也旣而丹叔以秩滿遷除

分守慶遠驥足初展鹿幘爭迎海綰銅符頻移劇郡交
民之得賈父乃見清平漢廷之用弱翁深知治行而丹
叔案牘旁午不廢清吟溪峒煙嵐都將入詠前年刊寄
所作索序於余時余集亦編成將付剞劂雖雲龍上下
未知相逐於何年而笙磬同音不啻合奏於一室顧念
丹叔功在邊徼惠及下民文章足以藏名山事業足以
留金石子建所志丹叔爲無負矣况日在扶桑更有進
而益上者乎如余則遇同顏駟空望亭外白雲才愧邱
遲僅有夢中碎錦回帆已決做帚徒珍序丹叔詩能無

延秋吟館詩鈔

序

九

泚然顏汗哉光緒六年九月同郡弟陳文田拜序

有專於爲詩之詩有不專於爲詩之詩專於爲詩者凡夫民物之利病世運之消息舉不入於其心而獨於詩若性命之相依飲食日用之不可離嚴推敲於一字積艱苦於畢生要以求爲詩人而止而其所詣亦遂於詩而止試之以事臨之以大節則有不可知者矣若夫不專於爲詩者天之生之固不欲其以詩人傳也而其才力能兼爲詩人而有餘若裴晉公李贊皇之爲相張中丞岳鄂王之爲將彼其匡時偉略照耀古今何暇與文人爭席然其傳於後世者零章斷句猶足以使人欣仰故曰不專於爲詩者之詩也丹叔昔治舉子業屢不得志於有司又值中原多事馳驅戎馬之間其於當世吏治骹骹上下相蒙奸民猾吏武夫悍卒之爲害蓋一一心焉數之顧不獲一假手則聊以詩寄其所抱負旣而一麾出守發奸摘伏若有神助盤根錯節沛乎有餘退食之暇則又以詩爲休息而其所以爲政者亦流露其間前旣刊爲延秋館詩二卷今自丙子以後又盈一帙顧不鄙愚拙出以相示而並命爲之序余與丹叔幸同里巷自外出爲吏少知吏道之難益願天下多得賢吏

其心折於丹叔者益至奉檄相逢未幾又別微丹叔之
屬余固不能已於言也雖然余非知詩者若丹叔之詩
可傳而其人不得以詩傳則余能知之矣光緒壬午律
中黃鍾之月同郡陳彝倚裝拜題

延秋吟館詩鈔

序

七

丹叔負異才官粵西屢宰劇邑以能吏名逮牧全州下車月餘決疑獄以干計民大感悅先是夫已氏擅滅州賦二十年官私重困丹叔乃下教復舊賦父老咸踴躍樂輸悉如原額中丞新甯劉公曰俗吏追呼敲扑所不能得之閭閻者張丞顧以聽訟致之藉撫字爲催科賢於陽道州遠矣由是政聲藉甚東西長吏屢以異績上聞駸駸嚮用朝列無不知有丹叔者然丹叔宅心恬曠澹於榮利退食之暇種花賦詩記室康君桂州名士丹叔羅致幕中相與唱酬譚讌以故詩境變而益上幾欲

延秋吟館詩鈔

序

三

遠攀韓杜近躋歐蘇蒙示近詩波瀾老成又異於十年前所作竊怪丹叔簿書鞅掌而精進如此其精神福澤殆有大過人者行見一官一集位業丹青李衛公一品名編當俟鄭左台序之非鯁生所能贊一詞也癸未夏五加墨一過并識歲月如右祥符小兄周星譽

延秋吟館詩鈔序

唐代多詩人然新舊書傳循良吏二十餘人其能革苛
燒之風專惠露之澤皆卓然有治聲而無一人以能詩
名大氏政事有餘文章不足兼者尠矣其或如退之之
荆潮樂天之荆杭子厚之荆柳皆治績章章可紀遺愛
傳今日特其勩業文章聲施爛然爲時名臣又不僅以
循良著者丹叔觀察由司常出宰粵西洊擢那牧幹力
勤濟汲汲於民所疾苦尤能折疑獄鋤奸猾隼旗所至
民物改觀夫桂林多佳山水往來於灘江藤峽之閒杳

延秋吟館詩鈔

序

三

嶂馳湍噴岫森漫一切可驚可喜之狀與夫樛枝灌穎
潛鱗矯翼景物會接悉寄於詩觀察未嘗求工於詩而
詩進矣及來官吾粵始盡刻延秋館詩并集前後札牘
之文爲學治雜錄續錄殆所謂文章政事竝擅其美者
讀桂水行梁化行諸篇藹然循吏之言抑亦淡於詩人
之寄意焉韋蘇州郡齋之詠元道州春陵之行曷以過
哉今觀察又移節荆南將見沔沔漢登荆門所歷益雄
詩境當益進而恢張才畧必有所建樹以表褻當時聲
流金石者且上追韓白諸公爲時名臣則又不僅以奉

職佳吏爭循良一席矣

光緒十有二年太歲丙戌秋七月既望治愚弟順德李

文田拜序

延秋吟館詩鈔

序

南



延秋吟館詩鈔序
光緒十有二年太歲丙戌秋七月既望治愚弟順德李
文田拜序

題詞

賀縣鍾毓奇 少峯

風雅才人慈惠師裁成治譜更裁詩遺篇曾記書三篋
異政今傳麥兩歧滄海得珠休恨少孤花翦葉始能奇
孫楊供顧登壇後蔚起聲名竟在茲
百鍊功存詩百首縱橫健筆氣凌雲宦遊嶺嶠山千疊
家住揚州月二分古籍紛醜金在冶餘波綺麗水成紋
此邦封域開秦漢潤色風花待使君

躬畊學種武侯桑垂蔭濃依召伯棠漫叟在官勤撫字
延秋吟館詩鈔 題詞 五

淵明居里近清狂每於風月親談柄愧乏瓊瑤作報章
芹獻野人無別物留題卷尾附珠囊

全州蔣琦齡 申甫

南湖化俗遇文翁儒雅風流迥不同退食鑪香縈畫戟
掃除庭訟答詩筒竹西歌吹聲名久嶺外煙霞吐屬工
何待重來迓旌節珍題遍已碧紗籠

躡屐新聞詣翟湯才名久足繼文昌衡門朽木勞施禮

樂府新辭遠擅場興學湘州宜配柳受厘蜀土好栽桑

經年子翼知難借

已聞真除
命攀轅無術

新

葭水唵懷又一方

丹徒莊忠誠 希祖

一別匆匆今五載又從鄉井話征途世間竟有陽生事
仙犬胡麻定不誣

漫從安謚憶干戈往日曾傳烽火多湘水上流灘水接
又安生聚聽詩歌

龍翰 朱已逝跡誰優只恐珊瑚筆網收天遣南中留一

老過人風格蔣全州

此日聲名循吏推詩如製錦亦奇才出山他日才能展
莫爲篇章苦翦裁

延秋吟館詩鈔 題詞

十六

興國邢世銘 子膺

迢迢七千里天未故人來我慰長年夢誰堪用世才春
華歸造物秋菊且深杯老拙惟思隱勞君遠溯洄

元和袁寶璜 渭漁

昔誦容甫廣陵對 見述學 清淑之風心焉儀天塹帶水咫

尺際蠟屐不著山靈嗔竭來南中橐筆走窮鳥作賦棲
無枝正平懷刺尙遲謁文舉薦贖慙先施鯁生何幸得
遇此儉幕許做紅芙池詩卷治譜授我讀名士循吏身
兼之君自禮曹出司牧騰譽卓卓風颺馳慈雲一片東

西嶺霖雨之施民繫思韓蘇舊治盛難繼出治例遣良
有司延秋詩懷厯民物風流藻耀汀州伊學治雜錄鳳
髓判三魚牘言例同斯嶺海政治久弛替僉荒之俗儕
侏儻昌黎遺教漸焉歇士鮮劬古無導師方今珊網羅
珠海詞叢誰歟雄踞罷庭筠捉刀漆園牘蚩蚩冒法收
名期知君鑿衡空平持壺冰尺玉心泯欺行見相驥羣
空冀神識所燭材靡遺 國恩家訓懍無忝筭蕩所泣
清名垂合浦珠還鬱林石南國廉吏今見之神源藻醴
根毓芝固應令子才不羈伊余行能百無似開闔濫容
延秋吟館詩鈔 題詞 七

齊竽吹猛龍政德夙心誦他時請書清河碑

長白長善 樂初

獨抱心香接楚騷應憐餘子太啾嘈風詩自寫天真出

樂府猶傳雅管操 大作純寫性情內如梁化行等篇尤得樂府遺意 豈有光芒

埋劍氣漫誇姓字註仙曹蠻花犵烏歸陶鑄一鶴翩然

啖九臯

君不見泰華三峰高龍嵒從江河萬古流淙淙何人獨具

大手筆氣挾山海開鴻濛延秋主人文章伯清才矯矯

人中龍詩人自古屬循吏龔黃元白將毋同昔年京國
著雅望容臺玉佩鳴琤璫于將莫邪久不屈一麾出守
來南中南中自昔號難治風氣剽悍多頑叢愛氓誰復
繼璟相化俗今迺追任翁龍筋鳳髓善折獄鼠牙雀角
無終凶訟庭花落政清簡仁風膏雨蘇疲瘵頌聲載道
歌五袴畱臣報最時乃功手持雙旌報

天寵繡衣喜見膺

鸞封揭來軍儲賴擘畫倉囷上備

天庾供蓮花清絕桓公幕鯁生亦得相追從燕寢凝香

延秋吟館詩鈔

題詞

十一

書多暇詩成仙吏何從容瑤篇示我百回讀光燄萬丈
生長虹風檣陣馬逞馳驟黃鐘大呂超凡庸良金鍛鍊
露精采青萍淬厲藏英鋒就中長句更傑出梅村玉叔
難爭雄我聞淮揚好山水扶輿清淑氣所鍾讀君詩句
信非偶別材天授非人工勳名竹帛自一事風雅已足
垂無窮願君比迹者誰子金鑑千秋文獻公

番禺吳國鎮 玉臣

灕江雅什擅才思珠海旋看使節移五管秋風扶健筆
十年宦跡付新詩杜陵晚律彌能細宋玉微詞偶帶規

一集一官憑遞紀弓衣先繡越城絲

延秋吟館詩鈔

題詞

十九

延秋吟館詩鈔卷一

從祀南郊

江都張聯桂



千官肅穆侍辛祈向曉星辰漏漸稀劍佩聲迴

天咫尺旌旗雲擁日光輝

九重閭闔開

丹闕一片氤氳近

紫微何幸小臣隨

警蹕衣冠新惹

延秋吟館詩鈔

卷一

御香歸

羊流店懷古

重訪羊公里祠堂草木榮殘碑蝕日影老樹戰秋聲裘

帶今何在機槍尙未平紛紛肉食者誰繼岷山名

吳陵夜發

扁舟歸去客心閒寒戀重衾睡正酣一夜艣枝聲不斷

載將風雨過城南

棠湖舟中作

仙風吹鶴下瑤池豈效寒雅借一枝泉水在山原不濁

嶺雲出岫亦何遲馬周未達誰能識陸遜丁年世已知
振觸琴絃同調少東風帆影到天涯
壯志頻將鐵硯磨忍教歲月任蹉跎人情反覆空鳴劍
時事艱難望止戈官冷轉慚邀薄祿田荒稍幸免催科
客中聊作消愁計斜倚梅花對酒歌

楊花

陰陰桃李鬪芬芳何事嬌柔趁豔陽潔白自高羣卉質
軟紅輕逐一身忙鳳池路遠春難駐燕幕泥新夢亦香
張緒風懷猶昔日未妨惆悵學清狂

延秋吟館詩鈔

卷一

二

堪笑浮生底事宜繁華如夢不勝悲蹙依芳草迷官道
有分清香入硯池壯志難逢青眼客苦吟深怕白頭時
升沈原屬尋常事一任東風著意吹

岳阜

崇祠在高阜時難復登臨碧樹自春色青山剩鳥音欲
加名將臯豈獨佞臣心寃獄成三字高宗意亦深

同姚二仲海

正鏞

登文游臺

偶從勝地留行跡漫遣襟懷得蹙開遠樹千重當檻出
平湖卅六抱城回人文已杳空嗟及今古無端入望來

烽火斜陽悲畫角與君何幸復登臺

七夕

高樓沈沈新月明玉繩倒挂涵虛清
雙星恨不隔河漢少婦從茲多怨情
空房淚落思幽悄苦憶征人愁向曉
關山風露客衣單瓜果庭空自乞巧

長相思

隨君遠方來願同塵與灰

用李句

後事忽更變前言空疑

猜雁鳴蛩唱秋聲裏輾轉憂懷淚如洗
寸心清是在山泉已分波瀾誓不起

夜來風發動林樾獨向窗中坐愁

延秋吟館詩鈔

卷一

三

絕如何兩地別離心同是孤舟共明月
憶昔茫茫多苦顏送君千里望君還
君還幾日期難必妾夢不離江水

過巖社湖

林外朝曦宿雨收半帆輕颺過秦郵
旂旛蔽日仍軍鼓波浪兼天有釣舟
空羨鯉鵬溟海志可憐鴻雁稻梁謀
灘前蘆荻蕭蕭影容易秋風換白頭

題黃琴川太守

涇祥

珍珠曲後

青陵臺畔悵遺芳一曲箜篌淚數行
怨海泣珠憶鮫女

情天補石讓媧皇啼殘鶻血春難再抽盡蕉心句亦香
多少閒愁對明月平湖三十六鴛鴦

有贈

羅帷曾送七香車潦倒無心問酒家愁緒怕聽折楊柳
幽懷忽繫落梅花拳簾共覷階前月隔座頻傳雨後茶
盡日尋秋何處好微雲涼到水之涯

啜茶天氣倚闌干底事相逢帶笑看儂似輕鷗渠似鶴
淡於幽菊靜於蘭雁箏十索絃絲苦牛女雙星夜月寒
隱隱紅牆今夕永迢迢銀漢五更殘

延秋吟館詩鈔

卷一

四

筮篋欵上試新聲太息飄零劫後塵十月干戈驚老大
三年風月足清貧星辰有分塞珠箔瓊壁難教刻翠珉
漫道相逢成太晚萍蓬人海信前因

善病秋人弱不支藥爐茗盃伴深思刻猴棘刺端無迹
作繭蓮心信有絲響屨自迷香逕草朱絃空擬碧梧枝
癡懷欲訴團圞月三五從教會有期

寒夢曲

熏籠灰冷幕重重刀尺中閨臨鏡慵明滅寒燈思欲絕
朦朧孤枕睡初濃哀絃串斷相思意羅巾欲滅相思字

握手翻疑夢寐歡，倚幃共拭衣衫淚。拭淚頻驚羅袖單，
繡衾翡翠五更寒。可憐無限離思苦，可解相逢訴說難。
相逢容易愁相別，重門深鎖花飛雪。莫向空枝覓鳳凰，
莫從冷月傷鴉鳩。銅龍水滴漏聲稀，寶鴨煙消香氣微。
輾轉空牀天欲曙，迷離幻影事都非。

贈別

好夢頻驚惱曉鶯，自將閒恨託簫聲。淚如秋雨絲絲密，
愁似春潮夜夜生。縱許尋巢歸燕子，難期療妒有倉庚。
當年不識桃源路，無此天涯一段情。

延秋吟館詩鈔

卷一

五

碧窗翦燭夜清談，斜倚熏籠漏轉三。別心腸蓮子苦，
重逢情味荔支甘。常沾薄粉迷花蝶，難斷柔絲食葉蠶。
無語偷彈紅豆淚，惱人春色是江南。

冬柳

一樹婆娑感歲華，長條折盡客途賒。桓公垂老空流涕，
陶令初歸莫辨家。三徑草枯繫羸馬，五更月冷見棲雅。
可憐少婦樓頭雪，錯認東風颺落花。

淮東見烽火

驀地起戎莽，城東烽火紅。羽書馳汗馬，金鼓斷哀鴻。月

浸帆檣冷烟昏壁壘空可憐倦遊客輾轉思無窮

袁江夜泊

亂烽相照夜分明戰壘森嚴刁斗鳴旅雁不堪頻北嚮
孤篷何事逐南征舟臨月色疏燈暗夢繞笳聲獨客驚
太息樓臺歌舞地年年化作陣雲橫

長安月夜雜感

花事長安盛休教負少年冰霜增閱歷桃李共鮮妍心
豈將灰燭身如不繫船月明如有意盼到十分圓

望仲海書不至詩以問之

延秋吟館詩鈔

卷一

六

涼宵容易促蟲鳴離緒繁懷酒漫傾千里故人成遠夢
一簾疏雨對秋檠竟無消息南中到應有文章海內驚
悵望西風倍相憶樓頭來雁度新聲

九日薊州道中

峰巒環繞接邊城林外斜陽照水明黃葉滿天山寂寂
西風吹送馬蹄聲
薊門秋樹老蒼蒼雲淨長空雁一行天亦有情悲落葉
不教風雨黯重陽

古琴歎

古琴埋沒隨塵埃
工人復得何處來
街頭蹀躞不可售
有客空訝非常材
剗苔剔蘚去其垢
拂拭殷勤置座右
安絃微叩聲泠泠
月白風清一揮手
和寡心傷不復彈
深愁闇恨淚闌干
可憐古調無人識
况是希聲世所難
徘徊月落風蕭瑟
轉軸收絃藏密室
錦囊珍重遠塵埃
不用還同埋沒日

見折枝花

耐盡冰霜節
東風始著花
早知折枝苦
不敢鬪妍華

送別胡頌平孝廉

紹安下第

延秋吟館詩鈔

卷一

七

京洛縑塵點素衣
三年羈滯寸心違
途經山險休超乘
家在江干獨掩扉
失意故人驚夢遠
登樓遊子感春歸
臨岐亦有傷心事
從此天涯燕雁飛

薊州道中遇雨

驅車出郭門
山險願獨步
大風忽揚塵
蕭蕭白楊樹
雨忽隨風來
滂沱涉朝暮
古道流成河
高田踐爲路
執人詢迷途
又恐指者誤
躊躇向前行
十步九回顧
遙遙望遠村
戢戢傍人住
人生寄世間
誰如金石固
百年亦須臾
何必犯霜露
不如空山中
耕釣得真趣

妾住近南箕君居傍北斗合婚君遠行使妾空房守吹
衣秋風生照影秋月明秋風與秋月時時傷妾情妾情
如絲亂將連忽復斷歎息拭清砧獨立夜將半擣衣非
爲衣欲速之子歸遲遲未忍寄望望塞鴻飛道路豈云
遠之子自不返去時桃李華顏色歲月晚憂來取鳴琴
要難喻我心恩義貴終始請爲白頭吟

八月十五夜同人釀飲龍樹院凌虛閣

四字蒼蒼極望空銜杯月在小樓東征鴻橫露宵初白
延秋吟館詩鈔

卷一

八

長笛邀風燭不紅對面山都如畫裏舉頭天恰近秋中
卽今歡會休辭醉好語明年此夕同

桂橈蘭槳憶停舟

辛酉中秋夕與仲海飲吳陵舟中

秋近長安獨客愁

十載情懷都是淚一年明月此登樓歸心重負江東鱸
塵夢難馴海上鷗河漢無聲寒不落酒人身世雪盈頭

長至前一日通州道中

東望路茫茫千山拱

帝鄉天寒見松柏野曠足風霜矗塔餘斜照孤城接大
荒春回有消息明日晝添長

曉蓮二兄

聯第

從軍出關卽席贈別

十載京華聽鼓同來朝橐筆事兵戎當筵尊俎同明月
出塞弓刀控朔風北遶盧龍見冰雪東鄰元菟本岐豐
葱蘢佳氣陪都拱遼水西來正未窮

匆匆結束赴關陲磨盾功名及此時馬上鳴笳肅征旆
鴿原呼酒悵離卮軍書旁午須籌策驛路艱辛善護持
臨別牽衣無可贈夜闌翦燭強裁詩

贈陳慶雲侍衛

國瑞

卽送出師

大將威名眾所尊蘆溝相遇話黃昏半生戎馬劍三尺

延秋吟館詩鈔

卷一

九

千里風霜酒一樽北道新知偏我晚東山舊蹟至今存
長纓在手君行矣殺賊歸酬

聖主恩

曉登涿鹿浮圖

巍巍塔勢摩蒼穹參差對峙如雙峰入門下馬松陰濃
荒庭草合榛莽叢殘碑斷碣蒼苔封七層高聳何玲瓏
一塔突兀無行蹤一塔盤旋磴道通凭闕俯視青濛濛
置身高欲凌天風眼界一豁氣象雄我思締造驚神工
憶昔蚩尤肇兵戎涿鹿之戰摧其鋒中原盜賊何時窮

孤城百雉今要衝伊誰甲兵羅心胸渠魁殄滅恢奇功
須臾景耀搏桑東煙消霧豁還太空杲杲日出光曠曠
浮生塵夢猶夢夢安危倚伏理有宗恬然歸去聞清鐘

秋日旅懷

消渴梅林盼不真年華輕擲黯傷神何時始捧毛生檄
無藥能醫阮籍貧秋燕未歸猶是客白雲望盡倍思親
長安十載黃塵裏蝸角虛名亦誤身

戊辰雜詩四首

風雨如期天意回十年巨寇殄渠魁尊儒始自觀雲物

延秋吟館詩鈔

卷一

十

崇儉先惟罷露臺竈養中郎宜盡斥鴻磬四野尙堪哀
豐功緯績賢臣著只在調和元氣培

服有要荒載籍傳先王制度復何年豈能臥榻容酣睡
譬若彈琴當改絃往日徙戎空作論此時啟事重推賢
漢文每飯思名將雖許和親亦備邊

當局紛紛志未安河間好學具忠肝平生雖已除三惑
天下無如有五難召穆何時至南海淮陰此際待登壇
飛鴉食椹音多改莫使蒼生陷異端

堪笑浮生類轉蓬紛紛馳輿馬逐塵紅癡蠅到死猶趨執

大鳥高飛不避風事未尋源難若易理能參透困皆通
芻蕘一得原無益曝背當思獻日忠

張夏道中

山路崎嶇心自平從容攬轡望澄清事非當局難誰解
人到中年感易生變化風雲成幻境分離骨月是浮名
一官同似閑鷗冷粵嶠燕臺萬里程

自嘲

衣冠猶惹

御鑪香捧檄馳驅返故鄉每到思親頻入夢自慚選佛

延秋吟館詩鈔

卷一

二

未登場青衫淚溼同司馬玉筍班聯笑瘦羊薄宦十年
何所有半肩行李一詩囊

自京口乘輪船至漢口

黑煙衝起瘴難開輪轉如飛擁浪來勢逼魚龍思避水
機催風火斗驚雷樓臺瞬息名山過關楯周遭復道回
漢口帆檣斜照裏鄉關日遠客心摧

金口驛阻風

已苦三湘遠偏逢六月中舟膠金口驛日競石尤風巨
浪掀天白斜陽射水紅家書何處寄衡嶽有歸鴻

洞庭湖遇風

北辭岳陽樓南望湘陰縣洞庭湖水多蒼茫不相見北
風習習吹舟人解維纜中流擊楫高帆張巨霆暴作風
猖狂萬舟簸盪雨如注洪濤吐吸吞孤檣一波甫落一
波起一舟頓與天低昂帆欹檣仄盃羹覆妻孥失色舟
人哭民命安危天所持吾生忠信神可告鯨龍蠢蠢通
精誠須臾日出湖波明水鳥沙鷗紛送迎險哉此行三
百程黛丸一點蘸湖綠回頭遠揖君山青宗慤之願子
安遇一時於我能兼并升沈驚喜在俄頃安得世上風

延秋吟館詩鈔

卷一

三

波平

延秋吟館詩鈔卷二

江都張聯桂 丹叔

晚泊全州

雙塔聳玲瓏蒼茫暮靄中水清魚可數山峭畫難工城郭猶多壘人民已半空餘生兵燹後惟祝歲常豐

興安縣道中

蠻煙開處見崇岡修竹如雲少女桑車順水流輪自轉田隨山勢畝難方松間時露編茅屋亭畔惟餘刈稻場且息肩輿高處望桂林天近好秋光

延秋吟館詩鈔

卷二

己巳除夕

依舊清風莫療貧今年底事獨艱辛舟車遍歷七千里

印綬分持十二旬

仲秋朔抵省下旬卽署桂林同知三闕月又改攝靈川縣令

爲政

愧無經術輔祭詩祇覺性情真聲聲爆竹沈沈漏一夜

相思四處人

兩親均居里門伯父官昌平牧兄官比部郎弟以縣令需次保陽

春日評定試卷呈襄校諸友

議論才華各有真論文何必樣翻新回思五度秋風裏我亦荆山抱璞人

愧無玉尺手中持文字因緣信有之終日垂簾共欣賞

鷓鴣聲裏雨如絲

登靈川署東小樓感題二律

獨立小樓中蒼茫眼界空龍巖橫郭外

縣西三十里有山名龍巖高數

十丈爲一邑之勝

灘水繞城東

灘水自靈渠發源繞城東而南入臨桂

一日四時

氣寒暑朝夕屢更

兼旬半月風

山風最狂旬日不息諺云靈川風信不誣也

荒荒兵

燹後無術救民窮

最拙催科政空勞撫字心瓜期如許代蕉夢屢相尋時

難紆籌策家貧已賣琴寄言倦飛鳥何日入林深

陽生曲 有序

延秋吟館詩鈔

卷二

二

靈邑五都鄉有陽生名成萃性豪邁耕且讀遇

二女於途贈以鞞著而履空至一處類宮殿備

極窮麗有女王出粧飾古淡生不知置詞惟俯

伏而已妻以二女情好甚篤一日生思家女送

之歸夢神告以妖醒而有符在手懼不敢往女

所女知戎服來爲符所拒旣而有力士縛生去

女王將加刑生哀之復爲夫婦如初往來年餘

生男女數人棄雄留雌每食具山珍殮惟麥屑

屋多藏鏹亦不識所來友人爲予述之甚詳遂

作陽生曲以誌異云

曼翠層巒古始安

桂林卽吳之始安郡

煙霞勝境甲天南仙人居

處三山渺神女生涯一夢酣邑有陽生志豪爽讀書三

十猶草莽田間忽覩二妖姬皓齒明眸世無兩長袖微

遮屢願生短鞵持贈同邀往身輕步健若飛昇百尺晴

嵐頃刻上樓閣巍峩雲霧中門懸金額女王宮長生殿

迴鳴朱鳥太液池清戲白龍風送瓊花香几案月明金

屋隱簾櫳雕籠鸚鵡呼茶至繡被鴛鴦畫工目眩神

迷驚未了忽傳王后金鑿到飄飄仙袂古時粧洗盡鉛

延秋吟館詩鈔

卷二

三

華眉淡掃玉階俯伏奏無言溫詔宣修秦晉好願效英

皇夙世因良辰今夕休嫌早侍兒扶起到華清巧笑齊

稱駙馬名豈惹湯溫春賜浴芙蓉殿靜夜飛觥燈闌交

頸聽更永酒暖流蘇落帳輕何異天台囊藥客不殊漢

沼解珠情塵緣未斷鄉心切二女殷勤同惜別別後相

思兩地深桃花淚盡柔腸折女王鍾愛遣車迎玉洞重

來情更熱歡樂常開並蒂蓮沈迷莫解同心結往來歲

月黯魂銷誠可通神第可邀驅怪桃符初挂戶觸邪蒲

劍日懸腰誰知青鳥歸傳語惱煞觀兵大小喬錦帶戎

衣嬌結束花容月貌爭馳逐旌旆齊飛娘。子軍鏡歌苦
奏離鸞曲楚娃嬌小力難勝勒馬揮戈佯敗北武士擒
來在戰場驚魂莫定顏羞縮縛歸洞府繫轅門公主猶
思昔日恩鶯語轉圓珠腩腆蛾眉顰蹙又温存共來翠
館論心曲各把紅綃拭淚痕巫雲復朝暮復雨雙成吹
管旋娟舞去住蓬壺日月長生男轉不如生女辟穀方
奇足療飢點金術幻如堆土我聞此事解愁腸座客欣
然各盡觴萼綠華來原縹緲杜蘭香降亦荒唐人生富
貴渾如夢何若温柔老此鄉

延秋吟館詩鈔

卷二

四

哭曉蓮兄

京洛分襟溼淚痕當年遺像宛然存

己巳春將出都兄弟皆不忍別遂寫

像爲圖各藏一紙

怕吟東閣無因句空荷西臺紀績恩

兄於己巳冬由

比部郎考取記名御史

月夕似聞歸鶴駕雲山何處望鴿原人琴

痛絕情難已夜夜模糊夢返魂

晚霞

向晚樓頭返照侵峰巒仍護水雲深會期爲雨從龍去
肯作隨風與鶯沈一半晦時猶本色十分紅處總無心
天孫莫耀迴文錦寒女停梭感不禁

書事

瀚海肆長鯨風波久不平何多婁敬策誰似岳家兵往
事足爲鑑中興在此行符離縱一潰千古有榮名

送郭大柘農司馬

賁青

還鄉

同作炎荒客君歸我未歸虛名淡秋影薄祿報春暉意
逐風帆遠心隨月鏡飛煙波江浩渺到日蟹初肥
萬里故鄉還南徐北固間風霜新白髮兵火舊青山屋
老松猶在窗明草不刪蒼生霖雨望未許久偷閒

偶成

延秋吟館詩鈔

卷二

五

無端毀譽豈心驚自有千秋月且評黑白能淆似獨局
公私莫決任蛙鳴妒情應煮倉庚瘡雲影難遮日午明
虎尾春冰時警惕深慙碌碌負生平

陶侃勤勞思報國宋登明決共稱神但將民事同家事
孰謂今人遜古人滿目荒涼悲賊擾羣生休戚與誰親
捫心清夜原無愧辨謗何如日省身

蠅

笑爾竟何營趨炎逐臭行秋風掃不盡夏日曝旋生集
此來偏遠聞聲夢已驚可知微物性終是畏冰清

雨後自黃田墟至擔石村
霽色裊炊煙農歌遍陌阡四圍山滴翠一片水平田修
竹青垂地新苗綠到天勸耕如寫趣日日過村前

夏日登河樓

炎荒萬里路漫漫山勢嵯峨壓畫闌近水樓臺不知暑
當風松柏自生寒登臨悲豈同王粲經濟才誰似謝安
海上浮雲多變態中流何日挽狂瀾

七夕

洞裏仙人方七日千年已過幾多時若將此意窺牛女

延秋吟館詩鈔

卷二

六

天上曾無片刻離

秋夜作

光陰速似箭離弦一別鄉關又兩年鶴俸支來供菽水
魚竿拋卻負林泉祇緣素位難持柄稍慰蒼生不愛錢
放罷晚衙何事樂蕉窗對月寫詩篇

勵志

人生希富貴庶免寒與飢豈知富貴來時時蹈危機任
大責必重利害形影隨素餐固可恥僨事尤足譏何以
恤民隱何以化民私鑑空而衡平此理誰能知片念苟

不正眾嫉指其疵所期與古人戒懼以防微

定識

世人耳代目安知真是非儒者好論古所憑惟書詩辨
難紛不已予則有所思譬如今之事異口已兩岐百里
且不實况復千載時讀書貴得間觀人當於微心平論
自定豈爲人言移長吁啟戶立皓月臨深池

風箏絕句和韻

一出紅塵便有聲萬人翹首望分明任他天外風雲變
握定絲綸總不驚

延秋吟館詩鈔

卷二

七

桂水行

催科有專責路險敢偷安桂水百二里中有百六灘時
值仲冬月灘淺篙難攢舟子半在水推挽若猱攀溜急
勢直下扼險石巉巖水石相激射舟楫疑膠嵌進寸反
退尺右旋而左盤聲呼力並舉一縱如登山船小薄於
紙觸撼摧心肝偶立頭欲暈枯坐腰常彎兩岸無居人
所見唯重巒行行已三日始泊大凝灣好言慰父老約
法警冥頑什一古不廢農畢宜早完况生堯舜世賦斂
尤從寬子德不足述庶免酷與貪承乏近一載時時念

民艱今秋幸豐稔豈可累長官聞言眾生感輸納無時
閒明日隨流去孤帆帶月還

題荔波蕭氏三烈婦傳後

荔波城大於斗賊來攻困已久天降淫雨城難守城中
男女紛紛走獨有蕭門三烈婦一念千秋名不朽王氏
見夫語以手揮兒遁出豺狼口與娣抱孫立井右長媳
追隨唯恐後城門開蟻賊來鼓聲絕哭聲哀娣謂娣兮
休徘徊枯泉幾尺藏形骸憶昔分飛鏡與釵夫亡女天
百事乖此際心同古井水此時路近重泉臺姑同死媳
延秋吟館詩鈔

卷二

八

追至舅氏與夫倖獲生兩姑泉下誰趨侍弱質浮沈任
素波一門節烈垂青史垂青史獻天子聞風愧煞偷生
士

自揚

人生天地間碌碌無休息富貴日勞心貧賤日勞力勞
力與勞心無非爲衣食世路多嶮巇人情易反側試觀
嬰兒生未笑先啼泣樂境無二三憂心常感感感感何
所思所思盡吾職爲子當事親爲臣當報國名利非不
求深惡在苟得寄此百年身去之終有日臨去不可留

未去難辭責莫使後人評生前有失德

曉雨登河樓

風雨催花落陰晴釀麥秋水聲喧遠壑潮勢撼危樓初
日紅於火新秧碧似油最憐農事苦篋笠聚田疇

與友人登浮山

山在水中爲陳王釣遊之地宋時建祠見縣志

釣遊遺尺地廟貌已千秋造化鍾靈跡吾儕得暫留山
光環四面樹影聚中流休論興亡事開襟飲巨甌

示秦兒十八韻

男兒志四方安用悲遠離况乃返故里言笑慰重闈慮

延秋吟館詩鈔

卷二

九

爾在途日寒暖不自知江湖多險阻事事俱堪危遊覽
學易荒所戒毋自欺詩文與經史熟讀宜深思怡怡友
弱弟肅肅承明師名成固可喜蹇失未爲遲惟望守此
身勿負箴與規爲山已九仞一篲功莫虧爾行未出門
我意已先馳爾舟歷三楚我心常相隨憶我別親時暗
淚腸中垂念我必不置恨不同爾歸家貧謀祿養一命
焉敢辭敬官懷庭訓廉靜每自持願爾體此意毋貽父
母譏臨岐心鬱結揮淚重置詞

重過靈川縣

依舊山城枕大荒嗟予兩鬢漸如霜多情父老爭相問
今日翻成過故鄉

深愧吾民去後思官齋重到亦神馳小樓一角斜陽裏
記得登臨禱雨時

登全州城樓

龍蟠虎踞此嚴疆白草黃沙舊戰場嶺勢千重分楚粵
河流一綫下沅湘北門管鑰今誰掌東道舟車笑客忙
更上危樓窮遠目不知何處是吾鄉

過東園草堂呈蔣申甫京尹

琦齡

延秋吟館詩鈔

卷二

十

足跡遍天下聲名震古今遷鶯出谷早歸鳥入林深獻
策匡時難陳情慰母心始知賢者志進退協規箴
荊州瞻未得何處問行藏忽捧毛生檄來登裴相堂落
紅流澗水空翠撲書牀治譜從容訂銜杯話夕陽

由建鄉回城遇雨口占

高城春望溼模糊誰寫清湘好畫圖雲外有山皆滴翠
雨中無樹不含珠漸愁暮色催歸馬莫待秋風始憶鱸
星火茅檐沽酒路羨人著屐遠提壺

汀連吳楚鬱相望浩浩風煙接混茫波浪忽隨山勢劈
樓臺多向樹陰藏關雲過此朝無色海日浮空夜有光
獨上高亭閱人世葭蒼霜白水中央

登迎江寺塔

挂帆江上來塔勢壓高嶺巍巍撐蒼穹矗立招提境入
門枯僧迎蕪竹淪苦苦謂當兵燹時此塔獨完整攝衣
快先登一覽極奇景俯視大龍山頽然若平等盤旋過
數層萬籟俱寂靜微聞鈴鐸聲悠悠發深省置身恐太
高何敢臨絕頂不見城中人但覺天地迴

延秋吟館詩鈔

卷二

七

京口遠眺

磊塊填胷鬱不開茫茫宇宙此登臺金銀氣盡無青草
鐵甕春深長綠苔六代興亡餘北顧三山風雨自西來
浮生忽觸滄桑感又見飛鴻天外回
極目蒼茫歎逝波挽回無術奈愁何江城樓閣連雲起
海舶風煙瞥鳥過天塹可堪從古說酒懷誰復此時多
青山未盡行人眼攬取金焦一嘯歌

贈戴四子焯太史

恆

京國一爲別風塵五度春誰知歸里日同是哭親人世

路憐余拙交情愛汝真文章千古事用杜獻替在詞臣

登勝棋樓

蟻聚蜂屯十二秋誰知重上勝棋樓已隨浮世滄桑換
唯見長江日夜流一局楸枰空得失六朝煙景足勾留
英雄不及盧家婦依舊湖名喚莫愁

題謝大石溪逢源中年聽雨圖

萬里長風一葉舟蓬瀛清淺足勾留如何春雨還秋雨
愁得蘆花漸白頭

休歌楓葉落紛紛自有催詩一片雲得句若隨江水去

延秋吟館詩鈔 卷二

蛟龍驚起暮潮分

纔到中年莫感傷蒼生霖雨正相望晚晴本是人間重

樓閣半天橫夕陽

延秋吟館詩鈔 卷二 中年聽雨圖

...

...

...

延秋吟館詩鈔

延秋吟館詩鈔卷二終

文章千古事

延秋吟館詩鈔卷三

江都張聯桂 丹叔

服闋將入都告墓有述

親亡焉用祿此意古所取吁嗟食指多鬱鬱難久處入
山復出山告墓列樽俎再拜將有陳伏地淚如雨憶昔
粵游日上堂別嚴父父言官不易榮辱權在汝阿母來
父旁握手心悲楚謂兒將遠行驛路慎寒暑兒今又長
征音容不再覩頭觸三尺碑淚漬一坏土哭聲山谷應
疑是吾親語屏息不復聞沈痛裂肺腑親恩已難酬親
志尙堪補九泉鑒誠悃一身歷艱阻回首望松楸烏啼
日卓午

滬上

風帆萬道趁江湖都會東南此富饒百尺樓臺宜夏日
六街燈火似元宵線收電氣天機洩車走雷聲地軸搖
筦鑰當年忘不得吳淞戰壘荻蕭蕭

渡海

忽訝舟如葉隨山出海濱水天浮一色風火促雙輪波
外疑無地潮來信有神乘槎廿年志纔現畫中身

余少時有

乘槎向
日小像

丙子十一月四日奉守高州之

命越日詣

闕謝

恩恭紀

丹詔傳來

寵命優東華塵土許勾留金門乍啟雙魚輪畫燭猶明

五鳳樓咫尺

天顏瞻丙夜八干地角計庚郵

入覲時 太后 艱難時 垂問高州路程

延秋吟館詩鈔

卷三

二

世勞

宸慮兢業惟期實事求

又 諭時世艱 難實心辦事

垂詢西粵服官時花縣頻移鮮措施

問在廣西幾年署何州縣 政

績隗無三異著姓名偏動

九重知容臺鵠立曾觀禮泮水鸞聲早賦詩

又 問出 身對以由

附貢補大

常博士 回首風塵琴劍在寸心清澈敢存私

又 諭 查察州

縣不可

存私

潞河除夕

客裏光陰箭脫弦歲星今又見周天

乙丑夏 先伯父 權州牧會居此今

一紀 高燒蠟炬當深夜纔聽雞聲說舊年古寺香煙凝

瑞靄時住迴馬關鄰家兒女醉華筵送窮文字無多語

酒脯相將詩一篇

登廣州鎮海樓

振衣直上五層樓浩蕩乾坤一覽收山勢共圍羊石固
江聲遙入虎門流伏波柱遠荒烟暝朝漢臺空蔓草秋
窮目莫能窺絕域滄桑多少古今愁

過那黃嶺

巉巖直上逼青霄絕頂登臨一望遙雲過峯巒時隱見
延秋吟館詩鈔 卷二 三

風來草木互喧囂村邊亂石蹊成路澗底枯楊臥作橋
羨煞牧童牛背穩杏花深處學吹簫

筍竹墟阻淺

山迴日輪高春流滯小舸水深纔沒石灘淺不容篙望
雨農夫切爬沙舟子勞去年當此際江海涉波濤

答康子沂鼎銘明經見贈卽次原韻

先著誰爭祖述鞭雄師定許凱歌旋功名夢幻全無準
文字心香信有緣博浪錐偏同筑擊豐城劍竟伴琴眠
年來和靖風流甚鶴與梅花共一肩

時子沂隴
眷同行

粵嶠東西賦遠征十年宦迹愧虛聲事防已見猶多悔
名到人知不算清幸藉文章存治譜子有學治雜錄子沂作序每逢
山水動吟情珠江千里灘流急汎汎輕舟自在行

雨後自腰沽墟放舟

一輪日影射江灣百道泉聲出樹間輕燕啄魚常掠水
懶雲拖雨欲歸山亭邊旅客爭舟渡柳下漁人打槳還
今夕隨流當入峽羚羊風景足開顏

梁化行

戊寅孟夏調守惠州歲飢民貧弱肉強食所在

延秋吟館詩鈔 卷三

四

多盜被獲到官求生而不得誰非赤子隱痛

於中此州為梁化故地作梁化行見志

嶺南財富區此邦實貧窶兵燹既屢經歲歲傷霖雨禾
稼久不登習尚多好武讎怨積睚眦親朋立齟齬同室
操戈矛何分爾與汝重利析錙銖私鬪建旗鼓小戶易
欺凌巨族互攻取大姓欺小姓強房欺弱房積習相沿莫可禁遏獷悍蠢且愚
性命輕毛羽僱人械鬪謂之鎗手日給錢二三百文竟可得其死力死者屍縱橫
生者復為虜弔放成虛文勒贖搜阿堵被虜之家控官求救謂之弔放
更有綠林雄水陸劫行賈一呼集飢烏千百分隊伍民情

浮動一聞發財隨行者甚眾被獲到官並不能詳悉姓名但分總旗散旗若干人而已 乘夜踞碉

樓得錢市酒脯 村民以磚石造樓禦盜名曰碉樓每為盜襲踞 縣官豈不聞聞

亦難鎮撫兵役數十人奈此負嵎虎姑息年復年案牘

莫悉數詰問蒙

朝廷赫怒整師旅將帥深謀猷守令慎選舉我愧樗散

材承乏恐無補典郡甫四旬獲盜已百五累累階下囚

哀慘不忍語吁嗟此愚民訓練足禦侮用之守重洋聊

以固吾圉老農課桑麻少婦勤機杼漸聞絃誦聲四郊

成樂土此願豈久虛百年當復覩

延秋吟館詩鈔

卷三

五

望野亭

小亭高出女牆東楊柳葳葳入望中春去餘香留几榻

朝來爽氣撲簾櫳山光斷處歸雲白塔影橫流浴日紅

四角觚棱憑眺覽千秋野吏尙高風

惠州絕句

泉有貪廉莫品評酌來茗盃助詩情試看渾濁東江水

流入豐湖澈底清

遙指高峰訪洞天休將逝水怨華年尋常一樣迷花蝶

飛到羅浮便是仙

曉向橋邊理釣綸蘇堤垂柳挹輕塵牧童指點朝雲墓
生色湖山是美人
文惠荒詞久寂寥荔支無復贖枝條祇餘白鶴峰頭月
照見揚州廿四橋

酬張松谷

權

太守見示重遊惠州西湖詩卽訂後

古人已往不可追後之來者知爲誰人生同時不同縣
聞名兩地空相思君家曹娥我揚子滾滾江流限一水
我遊冀北君嶺南迢迢驛路將萬里我生況遲十九年

延秋吟館詩鈔

卷三

六

自謂識面終無緣那知聚散信非偶萍踪忽遇豐湖邊
湖邊山色鮮帶雨開襟暢飲歡當筵傾肝露膽妙有作
元氣灑灑如謫仙清詞麗句堪絕倒寸珠尺璧皆足寶
勝地名人兩盛衰相逢那不傷懷抱旁人不解笑君狂
君詩我讀心徬徨君昔豪筆事軍旅帷幄決策同子房
東馳西掃虎狼絕功成不伐口括囊何人筋力能終健
心血半耗鬚眉蒼卽今行樂老益壯豪情直逐層雲上
北海金尊到處開西湖畫舫隨流放作宦艱難祇自知
見人歡笑猶招謗不知何術合時宜不如乘興傾佳釀

佳釀長留訂後遊中秋同上望湖樓滿船載得天心月
又一東坡赤壁舟

自題荷薪圖

爾旣不能手持吳剛斧桂枝直向月中取爾又不能身
披五月裘姓名不許人間留冉冉忽忽年四十昨日入
山今又出小憩誰深棠杜思凡材豈是喬松質回憶誦
書時擔束力不支足踏槐花入雲去被風吹墮最高枝
久供禴祭燔柴用甘受清貧數米炊

昔官太常博士

粵嶠西來

極脩衍軟紅輕逐如蓬轉斧柯暫假不辭勞惜哉荆棘

延秋吟館詩鈔

卷三

七

未盡翦日輪西下雲影遮驀然心痛疾歸家親亡養志

成虛願拾得貂蟬安足誇

用北齊書江淹故事

當局紛紛棋勢變

旁觀柯爛空留戀械撲菁莪待取攜搜巖採澗誰推薦

南北風馳暮復朝古今得失鹿藏蕉天涯不恨知音少
恨識琴材尾已焦礪石霜鋒及時用扶持大厦要梁棟
錯節盤根著手難櫛風沐雨仔肩重重負難勝羨鳥飛
披圖顧影是耶非芒鞋筊笠歸何處一片閒雲上翠微

小樓賞雨

向曉臨高閣銅鈺挂樹間吹來一天雨頓失萬重山雁

影鏡中落漁歌江上還會當溝澮滿桑者自閑閑

己卯暮春雜感

欲破愁城酒力微落花風裏送斜暉水清自少鯨魚伏
網密猶多鷺鳥飛禮樂百年勞擘畫車書萬國共瞻依
最憐河內爭移粟已報西山賦采薇
誰寫監門一幅圖雲山滿日溼模糊荒園祇賸榆錢積
捷徑全憑竹杖扶鼠跡縱橫穿壞壁羊頭滋味備行廚
春雷陡起風催雨稍喜茅檐困漸蘇

古今得失幾英雄艱苦深嘗始奏功已見貂蟬遊上國
延秋吟館詩鈔 卷三

八

更無鷹隼擊長空形成聚米談偏劇術擅量沙計最工
獨有臥龍憂社稷莫教心血耗秋風

白首頻搔莫問天青春已過付流年樗蒲戲幻憂成賦
罌粟香濃醉欲眠生面別開仙佛外幽懷遙寄水雲邊
誠知精衛徒勞甚銜石思將碧海填

望野亭驟雨

晴空驀地噪飛雅窗掩昏黃黯綠紗疾雨沈山雲壓樹
狂風吹水浪生花城邊小市人聲寂江上孤帆天際斜
正是分秧望膏澤歡呼應遍老農家

重建野吏亭

不見陳文惠高風八百年築亭仍野吏題額紀坡仙東坡

有野吏亭記丹荔荒祠渺青山落照圓江湖分左右顧盼意

翛然

柳景榕

濃蔭遮天遠蟠根拔地回扶疎堪入畫臃腫不成材久

受香花供粵俗信鬼以榕為神立廟祀之偏無霜雪摧始知庸是福松

柏有餘哀

仿小遊仙詩

延秋吟館詩鈔 卷三

九

會睡崑崙一夢酣塵寰小謫到天南瀛洲本是神仙境

縹緲徒聞海客談

小園卽事

一院飛花西復東纔穿籬落又簾櫳無端忽被風吹去

祇見遊絲漾碧空

早起

夢魂驚落葉五夜忽飛回曉色羣雅起秋聲萬馬來歸

耕空有願避債竟無臺深負東籬菊凌寒兩度開

暮秋登西湖船亭

亭建於己卯春

喜從粵嶠見西湖筆錫嘉名自大蘇八百年來幾興廢
兩三客到共嬉娛追尋舊跡滄桑改點綴新亭風景殊
借得米家書畫舫載將明月泊城隅

蒼葭白露水中央鏡裏遊人鬢染霜半世浮家隨宦海
何年買棹下錢塘壺觴往日聽春雨簫鼓歸途送夕陽
聞說鯨波猶未息乘風旌旆欲飛揚

庭前古梅冬月着花喜而有作

莫向羅浮問酒家一株東閣影橫斜吹噓不借春風力
暖日晴烘便着花

延秋吟館詩鈔

卷三

十

百花次第鬪芳陰轉眼冰霜落葉深寂寂空庭松竹裏
暗香能慰歲寒心

答友人

傲骨嶙峋意氣豪銷磨車馬又風濤才堪應變談何易
心到能閒品自高時難宜勤陶侃壁家貧猶贖呂虔刀
古書恨不十年讀蓬鬢於今見二毛

喜得鄒二湘圃

蘭生

書夜夢見之醒而成此卻寄

人生聚散如浮雲朝南暮北隨風行又如萍梗泛江海
波濤澎湃無時平憶君昔訪藍田玉與我聯牀風雨宿

躍馬走長安提壺醉盤谷獻策踏槐黃微歌攜黛綠十
載緇塵兩鬢霜文章不救窮途哭和羹未試心先灰一
朝奉檄任鹽梅掛帆直向西湖去分襪先從東道回從
此索居慘不樂秋月春花愁獨酌留滯南天又幾春孤
飛瘦損雲中鶴何處征鴻來尺素長空落同心之言利
斷金他山之石能攻錯額手再拜感慨深置諸座右爲
規箴父兄久故不聞過勢交諛語原非眞宦途况復競
徵逐爲雲爲雨易翻覆誰能休戚痛相關誼重葭莩情
手足君言慷爽見眞性我意欽遲豁心目分明此景廿
延秋吟館詩鈔

卷三

七

年前絮語西窗同翦燭昨宵鼓柁渡錢塘繫纜直登君
子堂見君顏色訝非舊彷彿齒落鬚眉蒼開襟痛飲忽
大醉一夢驚回猶酒香

酬范季高

定紳

少尉贈竹石畫屏

曾中不具邱壑趣此生空向羅浮住筆端不見煙雲鋪
渭川千畝奚能圖高平小范具奇氣與我相逢各相契
潑墨淋漓妙入神能參摩詰詩中秘一枝低亞一枝高
清風徐來月在梢反疑前夜雨太急籊龍化去飛層霄
更看壁上起煙霧別有深情託毫素君家本是瀟湘人

猶見英皇鼓瑟處
粼粼之質落落姿
攬轡澄清會有時
一心祝爾干雲上
莫使人稱老畫師

春日放舟湖上同人聚飲萃英堂

日日閒齋對古梅
踏青有約肯遲回
山光引我隨波去
春色催人載酒來
滿地綠陰榕葉密
參天紅樹木棉開
東坡遺蹟今何在
寺觀荒涼鎖碧苔

讀史有感

閱盡興衰今古同
閒愁難付酒杯中
樓臺蜃氣能嘘日
沙漠駝鳴屢喚風
西域竟歸蘇屬國
北門誰繼寇萊公
延秋吟館詩鈔

卷三

三

盈廷競獻平邊策
惟祝倉箱歲告豐
年少功名萬戶侯
又持龍節出麟洲
郝隆稍喜通蠻語
富弼眞能解主憂
兩洗甲兵籌上策
瀾迴砥柱望中流
全憑忠信豚魚格
舌底蓮華石點頭

漢廷屢下求賢詔
隋世非無應變才
白璧可能容後福
黃金何用築高臺
貢公喜友彈冠至
呂相知人夾袋來
但使聞言欽藥石
元規一疏不須猜

理財誰算策無遺
劉晏名賢事可師
野集雁鴻安故宅
軍嚴鵝鶴鎮邊陲
長江鐵鎖排堅艦
少府金錢塞漏卮

知是罪言如杜牧君臣嘗膽臥薪時

暮春書懷

醪醑花放柳絲低春睡方濃任鳥啼海上鯨鯢風激浪
堂前燕雀日銜泥厝薪誰作當頭喝圖蔓真教望眼迷
惟祝天心明月影清光照徹嶺東西

庚辰八月十五夜翫月作

棲鳥啞啞飛復繞仰視眾星光忽小乍從水面漾波紋
漸向天心懸樹杪此時萬里無纖雲瓊樓玉宇寒且清
蛛絲蟬翳各耀彩蚪琴蛙鼓相爭鳴拳幃思婦起長歎

延秋吟館詩鈔

卷三

七

倚馬征人動遠情金錢浪向空中擲玉笛虛傳世外聲
一年光景爭今夕況復昨宵風雨疾誰知湖水夕陽天
洗出秋光同一色老子乘興登南樓莫學新亭楚囚泣
海上浮槎來不來紅日已見扶桑出

登白鶴峯遊東坡亭過翟夫子故居

不見翟夫子空懷蘇長公兩賢留勝跡百世仰高風亭
挹遠峯翠帆兜落照紅何年騎鶴背攜酒覓鄰翁

惠民迎譚仙築壇報賽九月初四夜循行至白鶴

峯下

星斗生芒月初落隨行小隊頻吹角千家萬家深閉門
雞犬無聲嚴擊柝六街繞遍出東城城門半啟閒魚鱸
老兵偷睡夢正酣驚起木立猶未覺滔滔波浪鎖長虹
灼爍燈光照水紅歌臺突兀插雲際急管繁絃曲未終
萬頭攢動一片影高下不辨烏雌雄金鼓齊鳴截然止
烏飛獸散紛西東行行已至醮壇側平地樓臺過百尺
火樹銀花到處開碧雞金馬誰來格吁嗟乎小民勞苦
年復年飲自鑿井食耕田爾等不知蒙

帝力翻學桂觀求神仙神仙仙仙渺何處十萬青蚨已
延秋吟館詩鈔

卷二

十四

飛去

漫興

忽驚流水此光陰中酒情懷感不禁符竹豈憂無蟹味
棘荆空費刻猴心飽慙白粲炊成玉貧乏丹砂術點金
記得來時新種柳千絲垂地綠煙深
聞道瀛洲絕點塵釣鼈此地可垂綸杯中明月空留影
鏡裏花枝解笑人燕語鶯聲聽易老遙岑遠水望難真
可知八百年前約要與東坡久結鄰

登樓

悶懷何處遣日夕一登樓水落洲全見山環瘴不收霜
風涼畫角星火淡漁舟不覺雲陰合瀟瀟暮雨秋

延秋吟館詩鈔卷三終

延秋吟館詩鈔

卷三

風起卷中星火對漁舟不覺雲陰合瀟瀟暮雨秋

風起卷中星火對漁舟不覺雲陰合瀟瀟暮雨秋

延秋吟館詩鈔卷四

江都張聯桂 丹叔

登潮州金山

半空突兀見樓臺，曲徑盤旋破碧苔。
一水南趨歸海疾，三山東峙抱城回。
市聲遙趁風聲至，帆影斜馱日影來。
忽憶故鄉名勝地，天然圖畫喜重開。

署前鎮海樓歲久失修爲風雨所壞爰合同官捐

俸重建詩以落成

昌黎何處揭陽樓

王象之輿地紀勝云揭陽樓唐韓昌黎建舊蹟今不可考

鎮海名

延秋吟館詩鈔

卷四

從太守留

乾隆戊戌方蓮浦太守始易今名

朽木忽經風雨折，庀材重

爲棟樑。謀鳳山曉翠當窗入，鮑浦春潮繞郭流。從此波平鯨鱷徙，登臨不用杞人憂。

題鄒壯節正命詞遺墨卷子

莽莽黃沙殺氣來，石城旗鼓陣雲開。
望風大吏身先遁，貫日孤忠志不回。
灑泣登舟江水咽，銜鬚伏劍國人哀。
最憐馬革成千古，搜得遺書劫後灰。

墨痕慘澹挾風霜，想見從容赴戰場。
未斷餘情憐少子

書中有河德年幼全在兄長照應之語

已完大節報

先皇碑題峴首枌榆重廟食睢陽俎豆香賴有鳳毛存
手澤傳家忠孝

國恩長

壬午仲秋交卸郡符將航海赴省撫今追昔喜懼

交并率成四律自勗

符竹移三郡琴書載一車法先嚴佩憤清不在懸魚桃

李新陰滿

四次郡試前列入學者十常居八九

萑苻舊習除何期採虛譽

持節計軍儲

五月奉檄調署糧道

憶昔長安住無聊學解嘲囊空詩句滿衣敝酒痕交春

延秋吟館詩鈔

卷四

二

日鶯遷木秋風燕去巢窮通難自料歲月惜輕拋

無分佛名經龍門望杳冥思深頭易白才拙眼逢青棠

樹空留蔭蘭芽乍吐馨

七月七日新得一孫

仙槎何日到破浪渡

滄溟

萬國獻珍奇來賓集四夷願揮司馬檄敢效季鷹思銅

柱誰能立金錢久不支憂心頻輾轉看月五更時

糧道向管

洋務釐金兩局事多棘手心竊憂之

華堯峰

祝三

觀察以星變有感悟用杜工部諸將五

章韻作詩見示次韻和之

東南滄海北天山西域歸誠莫閉關

聖代治超唐宋上勳臣名在呂伊間聯珠喜見星垣燦

辛酉秋五星聯珠不數年俄人歸我完璧羞言戰血殷伊犁不煩

而金陵克復髮逆蕩平

兵除舊布新昭至德

深宮宵旰慰

慈顏

朝廷倚畀若長城海上樓船擁旆旌奉使遠持蘇武節

借籌虛練岳家兵葡萄美酒美心先醉罌粟花香夢亦清

別有深情效西子儘多奇計比陳平

延秋吟館詩鈔

卷四

三

轉輸十載靖邊烽忍使憂勤獨

九重澤竭魚枯惟網在倉空鼠竄尙塵封山川敢信金

銀見水旱頻蠲賦幣供誰塞漏卮籌遠計理財重任仰

司農

顧廚品藻想清標正氣常伸氛祲銷牛李性情終落落

范韓功業本寥寥漫矜岡阜鳴丹鳳未免風塵蔽黑貂

當局艱難誰領會須將吹索戒同朝

稻粱謀急未歸來天外冥鴻異地哀每聽鶡嘯思井巷

莫教蜃氣幻樓臺怕看明月人千里苦勸長星酒一杯

淨掃欃槍仍碧落

廟堂自有棟樑材

題金漉生 武祥 分轉遊桂林詩後

水自靈渠發山惟陽朔奇
讀君新詠本憶我舊遊時
灘急舟行速峯高日上遲
別來今十稔慚愧鬢成絲
不辭千里遠邊事問炎方
異境筆能狀奇才斗莫量
風流追畫壁雲氣壓歸裝
豈作滄桑感匡時策自長

廣州春感

東風城市起囂塵
椎髻常輕佩犢身
日月明難燭妖怪
延秋吟館詩鈔

卷四

四

山川氣少見金銀
挽回時事思居正
語到文廉問宋均
試向越王臺上望
珠江番舶彩旗新

歌舞岡前春草深
萍蓬人海任浮沈
附羶蟻早盈階砌
投宿烏猶繞樹林
身欲偷閒除引疾
才能遭忌亦知音
艱危珍重同舟侶
敢酌貪泉易此心

用原韻酬金漉生分轉次和遊潮州金山之作並

邀小飲

小亭何異妙高臺 江南金山 新句留題掃綠苔
西望越 有妙高臺

華千里隔東連閩海
片帆回無端今古人
何在有約湖

山我又來籬菊不花重九近一樽清酒爲君開

漣生又以遊西湖山並贈海陽令胡衡齋詩見示

再疊前韻和之

湖山斜對鳳凰臺有客尋幽屐印苔縣尉昔曾推趙德

指衡齋

詩人今又見方回鱷牙鼓浪何年徒蜃氣浮天頃

刻來稻熟螿黃秋漸老憂懷蹙向酒樽開

倒押前韻和漣生感事之作

海上旌旗一色開斬鯨共待使君來

指彭雪帥

劉鄩百計聲

先壯

指越南事

富弼更成意可回

指會龔侯

新樣樓船鍾鐵甲舊

延秋吟館詩鈔

卷四

五

時壁壘剗蒼苔軍儲搜括軍書急何處黃金高築臺

倒押前韻酬胡衡齋

鑑大令

捧檄毛生笑口開東南鳧舄忽飛來世情久歷炎涼慣

宦味都從甘苦回化比春風吹野草交原舊雨契岑苔

三年報最清貧好避債何妨再築臺

癸未重九偕友人遊湖州西湖山

秋色豁眉宇涼意透簾幕感此佳節臨風雨喜不作抽

身簿書叢欲踐湖山約良朋三五人形骸俱脫略沿隄

憩樹陰紆徑入蘭若快登待月亭共坐乘風閣晚稻綠

滿疇遠峯青到郭雲開見雁字波動知魚躍錢塘負重
名此地亦邱壑惜無東坡來勝境轉蕭索佳人不逢時
幽谷空寂寞古今同一慨多爲浮名縛更上葫蘆頂風
景益清廓形勢如建瓴全城此鎖鑰守禦或不嚴萬戶
遭剽掠憶昔兵燹時雉堞山腰絡咸豐甲寅土匪吳忠恕犯順當事者將廢城築而新之遙聞滄海深蜃氣浮碧落何當凌虛舟一劍斬
鯨鰐憂深聊自娛雙螯倩清酌興盡同下山明月出林
薄

和金淮生鳳凰臺題壁原韻

延秋吟館詩鈔

卷四

六

我上乘風閣

在西湖山君登湧月樓

在鳳凰臺

不虛重九節同占

十分秋豪興山雲起詞源峽水流自憐寒瘦態漁唱在

荒洲

秋夜西園翫月有懷姚二仲海張大鐵崖

雲鵬

署西有小園日夕聊散步長橋若虹垂怪石疑虎踞方
塘魚躍波曲徑苔侵路盤旋上層臺清景共奔赴月光
不離水秋聲多在樹野竹走龍蛇殘荷覆鷗鷺徘徊未
忍歸獨立影相顧憶昔遲雲館仲海齋名喜與知心遇故人
姚與張各鬪驚人句忽忽廿餘年攜手知何處莊周化

蝶飛

謂希祖

李白騎鯨去

謂水署

死別聲欲吞生別情更注

如何雙鯉來未見傳尺素袁江與大梁

仲海需次清河鐵崖遊慕河

皓鏡同飛渡客中詩應多莫被郵筒誤感念夜已深衣

袖溼寒露

癸未除夕作

聞道蠻天烽火紅有人血戰恥和戎虬髯竟逐扶餘主

指法越交戰事

馬援來收交趾功西賊膽寒威令肅東山齒折

笑談空

指彭雪琴宮保

諸軍壁上多觀望莫縱鯨鯢入海中

赫赫中山善用兵

指徐曉山中丞

岑彭忠勇久知名

指岑彥犬卿宮保

延秋吟館詩鈔

卷四

七

羊情性深難識貌虎聲威壯此行走筆淋漓揮短檄陳

書慷慨請長纓

指唐維卿銓部

百年欲保真無事電掃風馳敵

自平

煙雨迷離海氣昏誰能隻手轉乾坤素絲自重圭璋望

白簡頻聞藥石言畢竟狐裘同晏子敢將布被笑公孫

年來默數封疆吏舊日勳勞幾輩存

河決燕齊激怒濤鴻螭遍野慘呼號久停鸞爵西園例

浪說堆金北斗高

聖主恤民常盱食計臣折利到秋毫邊庭告警軍儲急

轉餉蕭何首屢搔

書生自愧奮空拳感事憂時夜不眠勢豈賦詩堪退虜
術能點石亦求仙惜陰陶侃先勤甓起舞劉琨後著鞭
稍喜士民逢樂歲無愁兒女鬧新年

甲申孟夏因公于役鮑浦舟中遣悶

橋邊解纜暮鴉嗁綠樹陰濃水拍隄枕上忽聞舟子語
一颿風利過梅溪

奇文誰使鰐魚降每念昌黎世少雙昨夜夢魂飛渡海
覺來依舊住鮑江

延秋吟館詩鈔

卷四

八

閣比蓬萊圖畫開恍疑蜃市見樓臺滄溟本據風濤險
翻使浮槎破浪來

一笑韶光二十年如何斥鹵變桑田中流無恠波濤束
都被冤禽取石填

解網難分螭蚌爭一尊清酒費平衡居然頑石頭能點
敢詡蓮花舌底生

孤負雲山客裏過豪情逸興半消磨來時明月歸時雨
他日風光又若何

題張少儀

鳳孫

觀察孝思墨淚遺冊爲張滙川

傳

沛作

風雨青燈夜不眠墨痕和淚寫雲箋危如李密情逾迫

時公之封翁任印江令犯罪遣戍祖窮比譙瑛志更堅

父母年老疾篤公具呈請以身代公家貧無力

納金贖罪

直欲一身行萬里最難三世慶重圓精誠

感格

天心轉份取捐金豈偶然

遺冊內有募金啟二紙上自公卿下至伶販無不仗助

赦書一紙降承明三子聲稱遍

帝京時都中謂公孝子君子才子也此事由來關至性當時原不慕浮

名金魚木鐸滇池遠公官至雲南糧儲道風馬雲車桂水清公歿後相

延秋吟館詩鈔

卷四

九

傳為桂林城隍神留與文孫勤護惜傳家墨寶重連城

題張星府鈞鄉思圖

男兒生有四方志高士常從五岳遊况值西湖聞喚鶴

且浮南海逐閒鷗鄒超作客風開幕王粲思家日倚樓

最是短檠秋雨夜廿年前事上心頭

賓主東南喜盡賢星府現佐海陽縣幕布帆何日得言旋杜洲地名

星府住家處月滿家園在花縣風清治譜傳謂星府乃兄金伯前權連平牧

現署陸豐令聞家書往還時與羹憶吳萼動歸興人如

星府商榷治譜故政聲卓然蜀柳想當年披圖亦有湖山約題句慙無珠玉篇

秋思

桓温重見金城柳元亮空存栗里松
味美鱸魚懷故國心隨鴻雁到高峯
短檠獨對三更雨宿酒初醒五夜鐘
不是不歸歸不得邊庭猶未息狼烽

得勤甫

聯恩

弟書檄署曲陽令乞理縣譜舉十八

事相勗詩以代柬

雁行久分飛好音忽到耳形影睽兩地
問訊憑一紙今晨得北書未讀心先喜
自言廿餘年捧檄實此始艱苦已備嘗
清勤更自矢謂兄官粵西政績掛人齒
問途於

延秋吟館詩鈔

卷四

十

已經意欲循前軌下式言牧羊魯恭驗馴雉
高論不敢期古人亦難企惟當體人情曲折明
至理治邑如治家愛民如愛子衣食既已周
督責豈容已催科清其源判事求其是貪酷固
無論矯激亦可鄙諸傳譜傳家能名當有以
治術亦何奇平易得大旨鉛刀助一割願弟
權張弛行見恆山陽俗茂風亦美憶弟隴右
行間關數千里烽火正倉皇匹馬摩軍壘
年少膽氣豪度外置生死父母念遠遊
潛然門閭倚時兄爲禮官晨昏頻問視
婉言喻百端親淚始稍止弟今寫鳧飛兄亦冠獬豸二親

不及見流光逝如水喜極悲轉深痛哭陟岵配負米嗟
難得荷薪責在己努力振家聲聊洗俗吏恥何以報春
暉勿使愚民訾

甲申雜感

昔歲長星亘半空又看日夕火雲紅天心仁愛恆垂象
帝德憂勤屢省躬爭奈西秦狼虎國何殊南海馬牛風
白衣蒼狗多奇幻王朴平邊策已窮

交州南望棘門營草木蕭條風鶴驚羊胃爛誇都尉秩
鶯聲歌繫美人情誰教馬謖街亭敗賴有劉錡制使兵
若遣韞刀旋沒陣千秋青史尙留名

延秋吟館詩鈔

卷四

七

天威一怒肅朝端黜陟幽明便改觀老將廉頗廷詔起
新參呂誨袖文彈南蠻反側心多詐西賊驚疑膽亦寒
底事尋盟旋背約一時欲索解人難
閩嶠旌旗亂拂雲聲聲畫角隔江聞三年空學屠龍技
七日無靈祭鱷文北伐深源書怪事東征仁貴立奇勳
望洋向若真堪歎何處樓船上軍

有人默坐簿書叢暮滅朝刪奏判工千里長途勞轉餉
四方猛士解彎弓儘多鐵鎖籌吳彥恨少銅山借鄧通

擬乞媧皇五色石填平滄海奪天功

出海口占

密雨沈山色微風送我行煙衝沙鳥散舟壓浪花平
輒雙輪轉茫茫一葉輕何時柁樓倚飛劍斬長鯨

奉酬彭雪琴

玉麈

大司馬惠梅花畫幀

天寒野陰日無光紙窗竹屋凝冰霜歛馳驛使贈綺素
開緘彷彿春風香我公衡州一大老華光遺法非草草
古幹紛披枝怪奇點綴繁花向清曉昔移綵鷁游西湖
飽看孤山三百株今來羅浮聞翠羽醉夢美人香有無

延秋吟館詩鈔

卷四

七

目送手揮情所注淋漓潑墨筆成趣每逢勝地輒留題
神驚鬼泣頻呵護貴戚權門筆跡稀重之不減珠與璣
況乃風塵奔走吏敢冀蓬壁生光輝平生冷澹心如水
廣平去後無知己何意癯仙獨賞音吹噓不待東風起
冰天雪窟海雲昏鐵石心腸有幾人請公聊試和羹手
一筆先回大地春

延秋吟館詩鈔卷四終

同年張君丹叔吏於粵有循聲案牘之暇雅好觚翰所
作延秋館詩二卷既刊之矣丙子以後又得詩若干首
郵以見示風容色澤格律聲勢並臻其妙君固不屑以
詩鳴卽詩之工亦豈風塵中所有哉君自容臺出宰劇
邑洵擢郡守宦轍皆在兩粵粵中山水奇秀甲天下叢
巖靚壑靈泉奇木君之履綦皆及之一發於詩今奉
簡命觀察惠潮嘉潮韓公舊治惠州又蘇子瞻南遷地
也流風餘韻千載未艾丹叔勉乎哉察吏而安民一以
二公爲師則君之鼎足前喆獨詩也歟哉雖然昌黎在

延秋吟館詩鈔

跋

一

潮無可與語至從浮屠大顛游坡公作十八羅漢頌其
序云海南荒陋不類人世久逃空谷如見師友二公竄
跡瘴裔踴涼寡歡可以想見今逢

天子右文海暈通市蠻烟蛋雨之鄉冠裳輻輳官斯土
者得以其隙從容酬唱君之所遇視二公爲幸矣吾郡
賢吏唐時首韋白讀郡齋諸詠拳拳愛民之忱溢於言
表元道州春陵行亦循吏之詩也古之能爲吏者未有
不能爲詩讀君詩其信矣夫光緒十年十一月年愚弟
吳縣潘祖蔭拜跋

右問心齋學治雜錄二卷皆公牘文字延秋館詩二卷
則述性緣情之作癸酉以前公牘及詩皆在前四卷會
錢版於揚郡今併入丙子以後所作合爲一集重梓之
夫詩歌之道與年俱進經濟之事隨所遇爲設施此一
者余皆病未能焉所願持是區區者質諸當世君子云
爾光緒十一年正月江都張聯桂識

男心泰校字

延秋吟館詩鈔

跋

二

男心泰校字

第 180 号



730